

են որպէս միանձնեայ իշխանութիւններ եւ գործելով այս կամ այն քաղաքում, կախումն ունին նահանգի պետից: Սակայն դա չի խանդարում, որ կոլլեգիաներից իւրաքանչիւրը լինի պետական կեանքի ճիւղերից մէկն ու մէկի վարիչը կամ կարգադրիչը:

Աւելորդ չենք համարում բերել այստեղ կոլլեգիաների գործունէութեան համառօտ պատկերը, որպէսզի կարողանանք ցոյց տալ, թէ մեր հեղինակը ընդհանրապէս ինչպէս է իրեն պատկերացնում՝ անկախ Հայաստանի պետական կազմակերպութիւնը:—

1. Լրտեսապետութիւն կամ լրտես պետութեան. խաղաղ ժամանակի շտաբը 12 հոգուց է բաղկացած, իսկ պատերազմի ժամանակ՝ 36 հոգուց: Լրտեսները զգուշութեամբ պէտք է շրջին, ինչպէս Հայաստանում, այնպէս էլ թշնամիների երկրում եւ լրտեսեն: Նրանց տուած տեղեկութիւններից լրտեսապետը ամէն շաբաթ կազմում է մանրամասն տեղեկագիր, որից մէկ օրինակը յանձնուած է նահանգի կուսակալին, միւսն ուղարկուած է Ազգ. Ժողովին, իսկ երրորդը՝ հանր. նախագահի ծածուկ խորհրդին: Փակ պիտի լինին լրտեսապետի բերանն ու ձեռները, որպէսզի ոչ մի դադանիք նա չխօսի կամ չգրի որեւէ մէկին, բացի վերոյիշեալ երեք հիմնարկութիւններից (կԵ):

2. Զինապետութիւն. զինապետից — օրինակ՝ Անիի զինապետից — պահանջուած է՝ պահել զէնքերը մաքուր եւ իւզով ծծուած, բոլոր կտորած ու փչացած մասերը շինածպատրաստ: Նա իր պահեստներում պատրաստ պիտի ունենայ «թվանդ — վաթսուն հազար, թափանջայ — վաթսուն հազար եւ սուրբը — վաթսուն հազար»: Եթէ անհրաժեշտութեան դէպքում որոշ քանակութեամբ դուրս տրուի պահեստներից, պակասորդն անմիջապէս պիտի լրացուի, որպէսզի զինապահեստներում միշտ լինի առ ձեռն առնուազը «24,000 հատ հրացան, 12,000 թափանջայ եւ 60,000 սուսեր»: Զինապետն իր բիւտջէն ստանում է նահանգի պետից (կԳ):

3. Վառօդապետութիւն. վառօդապետը հակում է երկրի բոլոր վառօդ պատրաստողների վրայ եւ աշխատում է, որ բոլոր վառօդները

պատրաստուին մաքուր եւ լաւագոյն յատկութեամբ — շուտ չփչացող եւ «համահաւասար կարողութեամբ, այսինքն՝ միեւնոյն ոյժն ունեցող: Սմբողջ Հայաստանում նա պիտի պատրաստել տայ միայն երկու տեսակ վառօդ, «ոչ յաւելի կամ պակաս», — մէկը խոշոր, «վասն թօփի», միւսը մանր՝ «վասն աղգօթի»: Նա պիտի հետեւի զարգացնելու վառօդի արդիւնաբերութիւնը մեր երկրում — թէ՛ քանակով եւ թէ՛ որակով, մանաւանդ որակով, որպէսզի մնայ «անչիջանելի փրկման եթէ ի ժամանակի տապու եւ կամ ի ժամանակի թուութեան, ցօղի եւ անձրեւի»: Վառօդը պէտք է պահուի ապահով վայրերում — թէ՛ քաղաքներում, թէ՛ բաց դաշտում եւ թէ՛ զօրքի մէջ (կԵ):

4. Կառապետութիւն. պարտականութիւնն է՝ զարգացնել կառաշինութեան արհեստը Հայաստանում եւ պատրաստել տալ հարկաւոր չափով կառքեր՝ թնդանօթ, վառօդ, ումբեր եւ զօրքի պարէնը փոխադրելու համար: Իւրաքանչիւր նպատակի համար յատկացրած բոլոր կառքերը պէտք է լինին միեւնոյն տեսակի, միեւնոյն մեծութեան եւ միեւնոյն չափի, որպէսզի մասերից մէկն ու մէկը կտրուելու կամ փշանալու դէպքում՝ միւսի նոյն մասը կարելի լինի անմիջապէս տեղը դնել (կԸ):

5. Վրանապետութիւն. վրանապետը պիտի հետեւի վրանազորութեան արհեստին ամբողջ Հայաստանում: Զօրքի համար հարկաւոր վրանները նա միշտ պատրաստ պիտի ունենայ եւ հետեւի, որ բոլոր վրանները լինին չորս տեսակի — մէկ մարդու համար, վեց մարդու համար, 12 մարդու համար եւ 24 մարդու համար: Իւրաքանչիւր տեսակի բոլոր վրանները լինին իրար հաւասար՝ իրենց բարձրութեամբ, լայնութեամբ եւ երկարութեամբ: Նմանապէս սիւները, սիւների գլուխները եւ պարանները հաւասար. վրանների ներսը ըսպիտակ, դուրսը կարմիր: Միայն «ծայրագոյն» իշխանների վրանները կարող են լինել «բեհեգեայ եւ լայնատարած» (կՐ):

6. Կերակրապետութիւն. մօտաւորապէս նման է մեր երկրազորութեան եւ զիւղատընտեսութեան նախարարութեան: Պաշտօնն է՝ հետեւել, որ բոլոր հողերը ցանուեն եւ մի քայլ